

दिनांक 17.08.2024

समय: 18.45 बजे

आकाशवाणी जयपुर-अजमेर

प्रादेशिक समाचार

- प्रधानमंत्री नरेंद्र मोदी ग्लोबल साउथ देशां ऊं एक-दूजा री ताकत बणण सारू एक जुट होवण री अरज करी।
- प्रदेशभर मांय डॉक्टरां री हड़ताल रे कारण चिकित्सा बन्दोवस्त माथे असर।
- उदयपुर मांय चाकूबाजी री वारदात माथे उपज्या तनाव रे पछे आज हालात काबू मांय-शहर मांय पुलिस रो और जाब्तो तैनात।

अर

- प्रदेश रा आथूणी ज़िला मांय केई ठौड़ां हलका ऊं मझला दर्जा री बिरखा-काले भरतपुर, कोटा, अजमेर, उदयपुर, जोधपुर अर बीकानेर संभागां मांय मझला दर्जा री बिरखा री आस।।

000

प्रधानमंत्री नरेंद्र मोदी ग्लोबल साउथ रा देशां ऊं एकजुट व्हे ने एक-दूजां री ताकत बणण री अरज करी है। प्रधानमंत्री आज तीजा वॉयस ऑफ ग्लोबल साउथ सम्मेलन मांय आप रा वर्चुअल भाषण मांय अनिश्चिता अर चुनौतीपूरण मौजूदा वैश्विक माहौल माथे चिंता जतायी। श्री मोदी जोर देवता कह्यो के अ देश जलवायु परिवर्तन रे साथे साथे स्वास्थ्य हिफाजत, खाद्य हिफाजत अर उर्जा हिफाजत री चिन्तावां रो सामनो कर रहया है।

-----

प्रधानमंत्री भरोसो दियो के भातर ग्लोबल साउथ रा सगळा देशा रे साथे आप रा अनुभव अर बूतां ने साझा करण सारू वचनबद्ध है। वणा कह्यो के शिक्षा, खमता निर्माण अर कौशल विकास रा हलकां मांय ग्लोबल साउथ देशा रे साथे साझेदारी मांय उल्लेख जोग प्रगति व्ही है। प्रधानमंत्री आस जतायी के आज री चर्चा ग्लोबल साउथ देशा कानी ऊं तैय लगस ने हासिल करण री कोशिश ने बधावो देवेला। श्री मोदी भारत कानी ऊं एक व्यापक वैश्विक विकास समझौता ई प्रस्ताव राख्यो। वणा कह्यो की ई समझौता री नीव भारत री विकास यात्रा अर विकास साझेदारी रा अनुभव माथे है। शिखर सम्मेलन मांय आं देशा रा विकास री चुनौतियां प्राथमिकतावां अर वां रा निपटरा माथे बतळ चालती रहवेला ई शिखर सम्मेलन रो मुद्दो सतत भविष्य के लिए सशक्त ग्लोबल साउथ है।

000

कोलकाता मांय महिला रेंजीडेन्ट डॉक्टर री हित्या रे खिलाफ आज प्रदेश भर रा सरकारी अर प्राईवेट डॉक्टर काम रा बहिष्कार माथे रह्या। ई घटना रे खिलाफ रेजीडेंट डॉक्टर पेला ऊं ई हड़ताल माथे है। भरतपुर रा आर.बी.एम. अस्पताल, जनाना अस्पताल समेत न्यारा न्यारा अस्पतालां मांय मेडिकल सेवावां माथे असर पड्यो। बीकानेर रा पी.बी.एम. अस्पताल मांय वरिष्ठ चिकित्सकां री छुट्टी टाल दीरीजी है। अठे सीनियर डॉक्टर बन्दोवस्त संभळ्या है। बालोतरा, डूंगरपुर, झालावाड़, भीलवाड़ा मांय ई डॉक्टरां री हड़ताल रे कारण अस्पताला मांय मरीजां ने परेशानी रो सामनो करणो पड़ रह्यो है। दौसा मांय ओ.पी.डी. सेवावां पूरी तरह ठप री। फेरु ई इमरजेंसी सेवावां चालती री। सवाईमाधोपुर मांय चिकित्सकां दोषियां री गिरफ्तारी री मांग ने ले र जिला कलेक्टर ने मांग पानो सूप्यो। चित्तौडगढ मांय डॉक्टरां अर नर्सिंग कर्मियां काळी पट्टी बांध ने विरोध जतायो। श्रीगंगानगर मांय प्रशासन कानी ऊं हड़ताल ने देखता जरूरत होवण माथे ऑन कॉल डॉक्टर बुलावण अर यूटीबी अर पीएचसी ऊं डॉक्टर बुलावण रा निर्देश काडी ज्या। डॉक्टरां री देश भर मांय काम बहिष्कार ने ले राज्य मांय स्वास्थ्य सेवावां सुचारु राखण सारु चिकित्सा अर स्वास्थ्य मेहकमां कानी ऊं चाईजता बन्दोवस्त तैय करी ज्या है। चिकित्सा अर स्वास्थ्य मंत्री गजेन्द्र सिंह खींवर कह्यो के प्रदेशभर मांय स्वास्थ्य सेवावां बणायी राखण सारु वैकल्पिक इन्तजाम करी ज्या है। चिकित्सा मेहकमा री अतिरिक्त मुख्य सचिव शुभ्रा सिंह बतायो के सगळा जिला अस्पताला अर दूजा चिकित्सा संस्थानां मांय आई.पी.डी अर इमरजेंसी सेवावां चलायी ज्यी। कुछ जिला मांय ओपीडी सेवावां ई सुचारु री।

000

केंद्रीय स्वास्थ्य मंत्रालय प्रदर्शनकारी डॉक्टरां ने वां री हिफाजत तैय करण सारु हर वाजिब कोशिश करण रो भरोसो दियो है। स्वास्थ्य मंत्रालय प्रदर्शनकारी डॉक्टरां ऊं जनहित मांय काम माथे आवण री अरज करी है। मंत्रालय कह्यो है के स्वास्थ्य पेशेवरां री हिफाजत तैय करण रा उपायां रो सुझाव देवण सारु एक समिति बणायी जायेला। साथै ई राज्य सरकारा समेत सगळा हितधारकां ऊं सुझाव मांग्या जायेला।

000

चीन रा पेइचिंग मांय व्ही 17 वां अंतर्राष्ट्रीय पृथ्वी विज्ञान ओलिम्पियाड मांय भारतीय पढेसरा रो दल तीन सोना रा, दो चांदी रा अर तीन कासी रा तमगा जित्या है। ओलिम्पियाड 8 ऊं 16 अगस्त रे बीचे व्ह्यो। चार सदस्यां वाळी टीम मांय राजस्थान समेत गुजरात केरल अर छत्तीसगढ़ रा पढेसर भेळा हा। अर्थ सिस्टम प्रोजेक्ट अर इंटरनेशनल टीम फाइल्ड इन्वेस्टीगेशन वाळी श्रेणियां मांय वां ने अ ईनाम मिल्या। पृथ्वी विज्ञान राज्य मंत्री डॉ० जितेन्द्र सिंह ई मौके भारतीय टीम ने बधायी दी है।

000

उदयपुर शहर मांय काले उपज्या तनाव रे पछे आज हालात काबू मांय है। शांति बंदोवस्त सारु ठाँड-ठाँड पुलिस जाब्तो तैनात करी ज्यो है। जोनल मजिस्ट्रेट रे साथै रिजर्व पुलिस बल रो बेसी जाब्तो लगायी ज्यो है। उदयपुर ऊं म्हाणा खबरनवीस बतायो है के नगर निगम आरोपी रा पिरवार ने नोटिस दे र गैर कानूनी निमार्ण ध्वस्त

कर दियो है। अठिने ज़िला प्रशासन आवता हुकम ताई सरकारी अर प्राईवेट स्कूलां मांय छुट्टी ऐलाण करी है। उदयपुर रा आरे-सारे रा ज़िला मांय ई वारदात रे पछे सावचेती बधा दीरीजी है। ध्यान जोग है के काले एक पढेसर रे क्लास साथी रे चाकू मारण री वारदात रे पछे उदयपुर मांय तनाव रा हालात व्हे गया हा। ई बीचे जयपुर ऊं सवाई मानसिंह अस्पताल रा तीन सदस्यां रो डॉक्टरां रो दल उदयपुर भेजी ज्यो है। राज्य मांय सगळा स्कूलां मांय कैची-चाकू ले जावण माथे रोक लगा दीरीजी है। शिक्षा विभाग ई बारा मांय दिशा निर्देश काड्या है। उदयपुर मांय व्ह्या हिंसक घटना क्रम रे पछे शिक्षा मेहकमो शिक्षाकां कानी ऊं पढेसरां रा स्कूल बस्ता री जांच करण रा हुकम दिया है। जे इण रे बावजूद कोई पढेसर कानी ऊं लापरवाही करी जायेला तो उण रे खिलाफ कार्रवाई करी जायेला।

000

राज्य रा आथूणी हलकां मांय मॉनसून रो दौर बण्योडो है। अठे कुछ ठौड़ां माथे हलका ऊं मझला दर्जा री बिरखा व्ही। लारला 24 घंटा रे दौरान सब ऊं बत्ती 14-14 सेंटीमीटर बिरखा जैसलमेर रा नाचना अर लाठी मांय व्ही। पोकरण मांय 12, बीकानेर रा नोखा मांय 9, नागौर रा जायल मांय 8 सेंटीमीटर पाणी बरस्यो। जैसलमेर रा नाचना नहरी हलका मांय आज कदेई तेज तो कदेई रिमझिम बिरखा रो दौर चाले। टोंक रा बीसलपुर बांध मांय पाणी री आवक बण्योडी है। बन्धां रो जल थर 313 दशमलव एक एक आर.एल. मीटर व्हे ग्यो है। मौसम मेहकमां मुजब काले कोटा, भरतपुर, अजमेर, उदयपुर, जोधपुर अर बीकानेर संभागां मांय हल्का ऊं मुझला दर्जा री बिरखा री आस है। बीकानेर रा नोखा मांय आज सिंज्या चार बालिकावां री तलाब मांय डूब जावण ऊं मौत व्हे गयी। राणासर ताळाब मांय अ टाबरियां पाणी भरण गयी ही।

000

सवाईमाधोपुर मांय व्ही घणी बिरखा रे पछे उनहाळू साख मांय फडका कीड़ा रा अंदेशा ने देखता खेती मेहकमां कानी ऊं कीड़ा ऊं बचावण सारू चैतावनी काडी ज्यी है। खेती मेहकमां री जाणकारी मुजब खेतां रे किनारे कचरा रा अळाव अर पुराणा टायर जळा र फडका कीट रा प्रकोप ने कम कर्यो जा सके है। मेहकमो काश्तकारां ने सलाह दी है के वे खेती सुपरवाईजर अर अहलकारां ऊं सलाह लेर ई रासायनिक कीटनाशकां ने काम मांय लेवे।

000

राज्य मांय तिवारी सीज़न रे दौरान माप-तोल मांय गडबड़ी रोकण सारू कंज्यूमर केअर अभियान सरू करी ज्यो है। खाद्य अर उपभोक्ता मामलात मंत्री सुमित गोदारा रा हुकम माथे आज ऊं 27 अगस्त ताई आखा राज्य मांय ओ अभियान चलायो जायेला। ई अभियान मांय फरियाद रो निपटरो तीन घंटा मांय कर्यो जायेला।

000

अजमेर मांय महिला पुलिस कर्मियां सारू रक्षाबंधन माथे काले अर परसु छुट्टी ऐलाण करी ज्यी है। जिला पुलिस अधीक्षक देवेन्द्र कुमार बिश्नोई ई बारा मांय आदेश काड्या है। महिला पुलिस कर्मियां पुलिस अधीक्षक रा ई हुकम री सराहवना करता वां ने धन्यवाद दियो है।

000

टोक्यो पैरालिंपिक रा सोना रो तमगो जित्या सुमित अंतिल अर शॉट-पुट स्टार भाग्यश्री जाधव पेरिस पैरालिंपिक रा उद्घाटन जळसा मांय भारत रा दल रा ध्वजवाहक व्हेला। पैरालिंपिक खेल 28 अगस्त ऊं 8 सितंबर ताई व्हेला। आ खेला मांय 84 एथलीट भारत री नुमाइन्दगी करेला। पैरालिंपिक खेलां मांय देश रो ओ सब ऊं मोटो दल है।

000

प्रधानमंत्री नरेन्द्र मोदी ई महीना री 25 तारीख, दीतवार ने आकाशवाणी ऊं प्रसारित कर्या जावण वाळा खास कार्यक्रम **मन की बात** मांय विचार बतावेला। आ हर महीना प्रसारित कर्या जावण वाळा ई कार्यक्रम री 113वीं कड़ी व्हेला। ई सारू आप मुफ्त नम्बर

1800 11 7800 माथे 23 तारीख ताई विचार अर राय भेज सको हो। इण रे अलावा नरेन्द्र मोदी एप अर माई जीओवी ओपन फोरम माथे ई विचार बताया जा सके है।

000

भारतीय वायु सेना-आईएएफ अर भारतीय सेना भेळा 15 हजार फीट ऊंचाई वाळा हलकां मांय क्रिटिकल ट्रॉमा केयर क्यूब रो पैली बार पैरा-ड्रॉप ऑपरेशन कर्यो। ई क्रिटिकल ट्रॉमा केयर क्यूब्स ने भारत स्वास्थ्य पहल प्रोजेक्ट भीष्म रे तैत स्वदेशी रूप ऊं विकसित करी ज्यो है। रक्षा मंत्रालय कह्यो ओ ऑपरेशन प्रधानमंत्री नरेंद्र मोदी रा मानवीय सहायता अर आपदा असर वाळा हलकां मांय महतव सेवावां देवण सारू व्हयो।